

Osvrt na 2016. godinu

1. 300.000 KM podsticaja poduzetništvu i obrtu, 218.000 KM novih ulaganja u Poduzetničku zonu "Vrtlište", poduzetnička svijest se budi u Kaknju...

U 2016. godini, kroz podsticaje privrednim subjektima koji su gradili poslovne objekte na području općine Kakanj, isplaćen je novčani iznos od 152.000 KM na ime refundiranja dijela naknada plaćenih za zemljište, rentu, UGZ...

Tokom 2016. godine kroz projekat "Pokreni svoj posao u Kaknju" podsticaj je ostvarilo 27 nezaposlenih osoba (6 više u odnosu na prošlu godinu) koje su, uz pomoć Općine, pokrenule i registrirale vlastitu djelatnost. Podsticajna sredstva za refundaciju troškova osnivanja obrtničkih, trgovačkih i ugostiteljskih radnji i dijela troškova osnivanja preduzeća "d.o.o" ostvarilo je 16 pravnih (7 više u odnosu na prošlu godinu) i 51 fizičko lice (20 više u odnosu na prošlu godinu) što ukazuje na činjenicu da se u Kaknju budi i da jača poduzetnička svijest koja je u našoj lokalnoj zajednici, obzirom na njen primarni industrijski karakter, još nedovoljno razvijena, ali sa tendencijom napretka.

U 2016. godini Općina Kakanj je novčanim iznosom od 78.567 KM sufinansirala troškove obuke, stručnog osposobljavanja i usavršavanja radnika u skladu sa potrebama poduzetnika i obrtnika sa područja općine Kakanj. Ovu vrstu podsticaja ostvarilo je 14 pravnih lica/obrnika koji su, zahvaljujući pomoći Općine Kakanj, zaposlili 30 nezaposlenih osoba koje su se nalazile na evidenciji Biroa za zapošljavanje.

U 2016. godini Općina Kakanj je pružila materijalnu, tehničku i finansijsku podršku Udruženju poslodavaca općine Kakanj "Centar za podršku biznisu" (UPOK), a finansirala je i troškove bruto plaće uposlenika/sekretara Udruženja.

U toku je i javni poziv za dodjelu općinskih novčanih sredstava u svrhu regresiranja kamata po kreditima odobenim u komercijalnim bankama u 2016. godini za poduzetnike i obrtnike.

Kao još jedan oblik podsticaja poduzetništvu, u 2016. godini izvršeno je umanjeње općinskih taksi na istaknutu firmu za 10-20 %.

U svrhu podsticaja razvoju poduzetništva i obrta Općina Kakanj je u 2016. godini realizirala iznos od 300.000 KM, što je za 50.000 KM više u odnosu na prošlu godinu.

Tokom 2016. godine u Poduzetničkoj zoni "Vrtlište" u kojoj je izgrađeno nekoliko poslovnih objekata, a gradnja se nastavlja, izgrađena je kanalizaciona mreža za oborinske vode, te izgrađena unutrašnja asfaltna saobraćajnica. Za ovu svrhu utrošeno je 218.584 KM.

2. Više od pola miliona KM podsticajnih sredstava u poljoprivredi, dodijeljeno 57 steonih grla, 8 tovnih junadi, 5.000 jednodnevnih piladi...

Ukupno izdvajanje Općine Kakanj u svrhu podsticaja u oblasti poljoprivrede u 2016. godini iznosilo je 389.346 KM što je za 134.292 KM više u odnosu na prošlu godinu. Na ovu cifru treba dodati i 77.270 KM učešća Humanitarne organizacije "Muslim Aid" u podsticajnim programima, kao i 46.000 KM učešća Humanitarne organizacije "World Vision BiH", tako da se dobije cifra od 512.616 KM koliko su iznosila podsticajna novčana sredstva u oblasti poljoprivrede u 2016. godini.

Općinske podsticaje ostvarila su ukupno 882 poljoprivredna proizvođača.

U oblasti poljoprivrede, tokom 2016. godine, primljene su 5.163 stranke što je za 752 više u odnosu na prošlu godinu. Od te brojke, u Registar poljoprivrednih gazdinstava (RPG) i Registar klijenata (RK) upisana su 254 gazdinstava i klijenta (34 više nego prošle godine), dok se 897 posjeta građana odnosilo na ažuriranje podataka u RPG i RK, podsticaje i slično.

Tokom 2016. godine Općina Kakanj je, zajedno sa Humanitarnom organizacijom "Muslim Aid", realizirala projekat "Proširenje 30 mini farmi" koji je obuhvatio dodjelu sredstava za proširenje mini

farmu kao i dodjelu sredstava za nabavku poljoprivredne mehanizacije i adaptaciju štalskih objekata. Ukupno su dodijeljene 43 steone junice, 8 tovnih junadi, 5.000 jednodnevnih piladi... Zajedno sa Humanitarnom organizacijom "World Vision BiH", Općina Kakanj je tokom 2016.godine realizirala projekat "Podrška ugroženim porodicama za pokretanje biznisa, poljoprivredne djelatnosti i obrta" u okviru koje je izvršena nabavka i dodjela 14 steonih krava, 6 ovaca i jednog ovna, 4 koze, jednog platenika, jednog motokultivatora, te pomoć za sjetvu i uzgoj nevena na površini od 20 dunuma.

Tokom 2016.godine u Kaknju je otkupljeno 650.000 litara svježeg kravljeg mlijeka, a u svrhu podrške proizvođačima (290 proizvođača) dodijeljen je općinski podsticaj u ukupnom iznosu od 40.856 KM.

Tokom 2016.godine na području Kaknja otkupljeno je ukupno 81.309,30 kg ploda maline sorte "Polka" i 26.090,50 kg ploda maline "Miker" i "Vilamet". Dakle, ukupno je otkupljeno 107.399,80 kg ploda maline što je za jednu primarno industrijsku sredinu značajan rezultat. Zahvaljujući podršci Općine Kakanj i Ministarstva za poljoprivredu, šumarstvo i vodoprivredu ZDK, te zagarantiranom otkupu ploda maline, Općina Kakanj postaje prepoznatljiva sredina po proizvodnji maline. Na općinski podsticaj u 2016.godini se prijavilo 87 proizvođača maline sorte "Polka" i 24 proizvođača maline "Miker" i "Vilamet". Osim toga, za općinski podsticaj za nove zasade jagodičastog voća (jesenska sadnja) prijavilo se 6 proizvođača, a certificirane sadnice su zasađene na površini od 14.605 kvadratnih metara.

Općina Kakanj je dodijelila i podsticaje za plateničku i stakleničku proizvodnju (69 korisnika), za osnovnu i dopunsku obradu poljoprivrednog zemljišta (96 korisnika), za otkup ljekovitog bilja, voća i povrća, za proširenje zasada jagodičastog voća (5 korisnika), za predate količine jagodičastog voća (111 korisnika), za podizanje novih zasada jagodičastog voća (16 korisnika), za sistem navodnjavanja "kap po kap" (103 korisnika), za sufinansiranje nabavke nove poljoprivredne mehanizacije (37 korisnika), za nabavku zaštitnih sredstava za intenzivne zasade visokostablašica, za specifične vrste poljoprivredne proizvodnje – ribarstvo, gljivarstvo, uzgoj konja, uzgoj prepelica i krznašica (8 korisnika), za uzgoj rasplodnih krmača (5 korisnika)...

U 2016.godini Općina Kakanj je, zajedno sa HO "World Vision BiH", kupila mašinu za proizvodnju satnih osnova i proizvodnju pogačica. Nabavka ove mašine, sa kompletnom pratećom opremom, koštala je 40.000 KM (Općina Kakanj 25.000 KM, 15.000 KM). Mašina je namijenjena da bude na usluzi svim kakanjskim pčelarima.

U 2016. godini realizirane su i aktivnosti na izradi Strategije razvoja poljoprivrede na području općine Kakanj za period 2016-2020.

U svrhu osiguranja uslova za rad kancelarije Saveza udruženja poljoprivrednih proizvođača "Kakanjska poljoprivreda – KAP", Općina Kakanj je isplatila 17.752 KM.

Na osnovu podataka prikupljenih putem Agrometeorološke stanice koja je u vlasništvu Općine Kakanj, poljoprivrednicima su upućivani savjeti i preporuke u vezi poljoprivredne proizvodnje. Organizirano je 11 teorijskih i dvije praktične edukacije kojima je prisustvovalo oko 800 poljoprivrednih proizvođača.

3. U cestovnu infrastrukturu uloženo više od 2 miliona maraka, ugovoreno još gotovo pola miliona KM

U skladu sa općim opredjeljenjem da se osigura ravnomjeran razvoj gradskih, prigradskih i seoskih područja općine Kakanj, tokom 2016.godine ulaganja u svrhu rekonstrukcije cesta na području Kaknja iznosila su 1.313.396,10 KM.

Ako se ovoj cifri još doda iznos od oko 870.000 KM koliko košta ljetno i zimsko održavanje puteva i drugih javnih površina (popravke, održavanje, čišćenje, posipanje abrazivnim materijalom) dobije se iznos od oko 2.200.000 KM.

U okviru ovih ulaganja izvršena je rekonstrukcija saobraćajnice u ulici Mehmeda Skopljaka, kroz naselje Albanija, čime je riješen dugogodišnji problem neuslovnih i ispućalih kolovoznih traka (uloženo 222.281,49 KM).

Za asfaltiranje puta koji vodi do Popržene Gore izdvojeno je 84.518,46 KM, dok je u svrhu nastavka izgradnje puta za Semetiš izdvojeno 30.002,22 KM. Ulaganje u sanaciju cesta na području Plandišta iznosila su 123.611 KM.

Riješeno je i nekoliko problema koji su zaista bili veliki prioritet. Izvršena je rekonstrukcija puta Alagići-Čizmići (87.933,12 KM), sanacija puta Bečirhodžići-Čobe-Safundžije (40.013,88 KM), sanacija puta prema Crnču (19.979,61 KM), sanacija puta za Čizmiće (19.998,81 KM), rekonstrukcija puta za Sopotnicu (39.993,09 KM), sanacija puta u MZ Papratnica (20.001,97 KM), sanacija puta u MZ Varda (39.668 KM)...

Na području Brnjica uloženo je 39.679,79 KM u sanaciju puta Stari dom-okretnica Brnjic (preostali zidovi), u rekonstrukciju puta za Starposle uloženo je 23.376,94 KM, u rekonstrukciju puta Kondžilo-Dom uloženo je 139.845,67 KM (preostalo još asfaltiranje)...

U saradnji sa Tvornicom cementa Kakanj i Hidrogradnjom realizirani su radovi na sanaciji industrijske ceste u Malješu u vrijednosti od 35.000 KM.

U svrhu podrške razvoju poduzetništva, izgrađena je i asfaltirana glavna saobraćajnica kroz Poduzetničku zonu "Vrtlište" ukupne vrijednosti od 224.475,80 KM.

Tokom 2016.godine nastavljeni su i radovi na sanaciji saobraćajnice u Rudarskoj ulici. Naime, za sanaciju dionice od Gradskog spomen-parka do objekta "Ekoton" izdvojeno je 26.970 KM.

U okviru radova na unapređenju cestovne infrastrukture izgrađena je i pristupna saobraćajnica u Povezicama.

Nakon realizacije dugotrajnih procedura javnih nabavki, u 2016.godini ugovoreni su i radovi na sanaciji 15 saobraćajnica ukupne vrijednosti od 438.495,93 KM. Radovi će biti realizirani kada to dozvole vremenske prilike, a radi se o slijedećim projektima: nastavak rekonstrukcije ceste Zgošća-Tršće (74.481,82 KM), nastavak rekonstrukcije saobraćajnice u Rudarskoj ulici (82.917,9 KM), sanacija puta sa izgradnjom obaloutvrde u MZ Haljinići (35.099 KM), rekonstrukcija saobraćajnice iza bivšeg Castella prema pijaci i izgradnja trotoara u ulici ZPO (33.146,88 KM), rekonstrukcija ceste od naselja Brus prema Jukama (24.345,15 KM), nastavak sanacije puta Stari dom-okretnica Brnjic (24.842 KM), sanacija puta za Krševac (18.175,20 KM), nastavak sanacije puta za Turaliće, sanacija puta za Kubure (19.000 KM), izgradnja pristupnog puta i proširenje mosta u Bilješevu (29.999,77 KM), asfaltiranje puteva u Ratnju, Rošćevini, Pavlovićima, puta Tršće-Makljan, puta u Gornjem Banjevcu...

Realizirane su i aktivnosti na izradi idejnog projekta zaobilazne saobraćajnice od BP "Hifa" do mosta "Zgošća". U završnoj fazi je izrada glavnog projekta saobraćajnice od ulice 7.muslimanske viteške oslobodilačke brigade do BP "Hifa", te izrada glavnog projekta glavne gradske saobraćajnice.

U 2016.godini u funkciju je pušten sistem video nadzora na području Kakanja. Video nadzorom su pokrivene lokacije na kojima se nalaze škole, saobraćajnice, vjerski objekti i brojni drugi lokaliteti.

Ukupna vrijednost projekta kojeg je finansirala Općina Kakanj iznosi 238.947,23 KM.

4. Više od 250.000 KM ulaganja u vodovode i kanalizacione mreže

Tokom 2016.godine na području Kakanja realizirani su, odnosno ugovoreni radovi, na izgradnji vodovoda i kanalizacionih mreža u vrijednosti od 275.321 KM.

U toku su radovi na izgradnji vodovoda Varalići ukupne vrijednosti od 90.499,39 KM, radovi na rekonstrukciji vodovoda "Lučani" vrijedni 77.793,46 KM, te radovi na izgradnji kanalizacije Brnj (20.359,04 KM, završna faza), dok su radovi na izgradnji vodovoda "Koprivnica-Banjevac" završeni (15.955,62 KM). Ugovoreni su i radovi na izgradnji kanalizacionog sistema u MZ Haljinići (37.398,9 KM) i radovi na izgradnji kanalizacionog sistema i uređaja za prečišćavanje otpadnih voda u naselju Kučići (33.314,72 KM).

5. Park prijateljstva, igralište u MZ Kakanj 2, asfaltirana dva sportska poligona na Bočici, počela realizacija projekta “Oaza”

U 2016.godini u gradskoj jezgri Kaknja izgrađen je Park prijateljstva koji obuhvata sportski poligon i dječije igralište. Park je izgrađen zahvaljujući novčanoj donaciji bratske Općine Aliağa u iznosu od 100.000 KM. U drugoj polovini 2016.godine započeli su radovi na izgradnji igrališta u blizini OŠ “Mula Mustafa Bašeskija” u MZ Kakanj 2. Igralište se gradi zahvaljujući novčanoj donaciji Tvornice cementa Kakanj u vrijednosti od 55.000 KM. Nakon što je izvršeno asfaltiranje staza počele su i aktivnosti na postavljanju mobilijara.

Planinarski dom “Bočica” sa okolnim bajkovitim ambijentom postao je reprezentativna lokacija na kojoj se svakodnevno odvijaju važni događaji za kakanjsku lokalnu zajednicu, a sve češće sudionici ovih događaja su ljudi koji u Kakanj i BiH dolaze iz drugih zemalja. Sa željom da ovakav trend dobije dodatni zamajac, Općina Kakanj nastoji da bude podrška Planinarskom društvu “Bobovac”, te da pomogne u nastojanjima da se infrastruktura Planinarskog doma “Bočica” kontinuirano unapređuje. U skladu sa takvim opredjeljenjem, Općina Kakanj je realizirala radove na asfaltiranju dva sportska poligona u dvorištu Planinarskog doma “Bočica”, jednog za odbojku i rukomet, a drugog za basket. Vrijednost radova je 18.178,69 KM.

U toku su radovi na realizaciji projekta “Oaza” u okviru kojeg će se ilegalna deponija smeća i zapuštena zona pomoćnog stadiona FK “Rudar” pretvoriti u funkcionalnu i edukativnu urbanu zonu (igralište i drugi sadržaji). Cilj projekta koji se finansira sredstvima “Canada Fund for Local Initiatives” i Općine Kakanj je podići svijest o potrebi zaštite okoliša i njegovoj ulozi u poboljšanju kvaliteta života u zagađenoj urbanoj sredini. Projekat implementira Udruženje za pomoć i razvoj “Hajde” u partnerstvu sa Udruženjem “Savjet održive gradnje”. U okviru aktivnosti na realizaciji projekta “Oaza” radit će se na raščišćavanju ilegalne deponije smeća u naselju Varda. Na toj lokaciji izgradit će se edukativno-rekreativno-zabavni park za djecu i omladinu koji će imati mnoštvo sadržaja koji će podizati svijest posjetilaca o važnosti zaštite životne sredine. Ovaj projekat je ocijenjen važnim i za FK “Rudar” Kakanj koji će dobiti pomoćni teren pogodan za treninge prvog tima, ali i za takmičarske nastupe mlađih selekcija koje više neće biti prinuđene tražiti terene za nastupe u drugim općinama.

6. Više od 2 miliona KM ulaganja u ekološke projekte, oprema za reciklažno dvorište, podzemni kontejneri, ekološki kviz, solarna klupa...

Tokom 2016.godine Općina Kakanj je vlastitim ljudskim i finansijskim resursima osmislila, isprojektovala, nabavila i na području užeg gradskog jezgra ugradila 25 podzemnih kontejnera na 12 lokacija. Ovaj novi koncept odlaganja komunalnog otpada je pokazao puno pozitivnih efekata. Osim toga, izvršena je nabavka i ugradnja grajfera na postojeće vozilo za odvoz komunalnog otpada čime su osigurani uslovi za pražnjenje podzemnih kontejnera. Realizacija ovog projekta koštala je 108.614,54 KM.

Tokom 2016. godine izvršeno je novo proširenje obima organiziranog odvoza otpada na području Kaknja, tako da je sada pokrivenost općine odvozom 90%. Planirano je da se narednih godina još povećava opseg odvoza otpada i da u konačnici obuhvati i preostalih 7 kakanjskih mjesnih zajednica. Kako bi svi građani plaćali istu cijenu odvoza otpada bez obzira koliko su udaljeni od centra grada, Općina Kakanj je izdvojila 56.300 KM u svrhu sufinansiranja odvoza otpada iz udaljenih mjesnih zajednica.

Općina Kakanj je finansirala i nabavku opreme za uspostavu reciklažnog dvorišta u Kaknju. Za nabavku prese-balirke za papir i PET ambalažu sa performatorom, te nabavku viljuškara, platformske vage, rešetkaste korpe, kontejnera i druge opreme izdvojeno je 100.000 KM.

U okviru nastojanja da se unaprijedi sistem daljinskog grijanja u Kaknju (grijanje toplom vodom sa Termoelektrane Kakanj), Općina Kakanj je tokom 2016.godine finansirala radove na rekonstrukciji vrelovoda na potezu od MZ Kakanj II do zgrade Re-AI Company, te jednim dijelom i na području MZ Doboj. Radi se o projektu ukupne vrijednosti 543.748 KM.

U 2016.godini su nastavljene aktivnosti čiji je cilj postizanje standarda energetske efikasnosti. Jedna od aktivnosti je i povećanje energetske efikasnosti vjerskih objekata, a radi se o objektu Medžlisa Islamske zajednice Kakanj i Samostana Kraljeva Sutjeska. Za ovu aktivnost izdvojeno je 145.000 KM. Osim toga, u svrhu povećanja energetske efikasnosti mjesnog doma u Bjelavićima, kroz utopljanje vanjskih zidova termoizolacionom fasadom i ugradnju izolacionog poda u samom objektu, izdvojeno je 12.564 KM.

Nakon prošlogodišnje organizacije događaja koji je zadobio simpatije kakanjske javnosti, i ove godine u Kaknju je organiziran "Energetski EXPO". Cilj ove manifestacije je podizanje svijesti građana, a posebno omladine i djece, o energetske efikasnosti i odgovornom korištenju energije, ali i upoznavanje sa savremenim tehnologijama i recentnim trendovima iz ove oblasti. U okviru ovog programa, za kakanjske mališane pripremljen je bogat edukativno-zabavni program. Na promotivnim štandovima predstavili su se inovatori, kompanije, posredničke institucije i organizacije koje proizvode i prometuju proizvode i usluge iz oblasti energetske efikasnosti. Na ovom događaju građani su imali priliku da se upoznaju sa načinima uštede energije u domaćinstvu, a mogli su vidjeti i najmodernije tehnologije iz oblasti energetske efikasnosti: solarnu klupu, hibridna vozila, električni motor i električni bicikl, solarne panele i kolektore, pametnu rasvjetu, eko-kuću, led rasvjetu, inovatorske projekte-HHO generator i udarnu pumpu. Penzionerima su dijeljene besplatne štedne sijalice. Građanima je predstavljena i prva kakanjska solarna klupa koja će biti postavljena u parku Doma kulture. Nabavku solarne klupe koja, između ostalog, ima bežični punjač mobitela i dvije USB utičnice za mobitel ili tablet, finansirala je Općina Kakanj. Organizator ovog događaja je bilo Udruženje „Centar za ekologiju i održivi razvoj“ – C.E.K.O.R. Kakanj, pokrovitelj je bila Općina Kakanj, a partner u projektu Javna ustanova Kulturno-sportski centar Kakanj.

U saradnji Općine Kakanj, NTV IC Kakanj, osnovnih škola sa područja općine Kakanj i nekoliko kakanjskih privrednih subjekata, u Kaknju je tokom 2016. godine realiziran ekološki projekat čiji je cilj edukacija stanovništva o potrebi zaštite životne sredine i podizanje nivoa ekološke svijesti kod svih naraštaja građana Kaknja, a posebno kod djece i mladih. Naime, u programu NTV IC Kakanj realiziran je ekološki kviz "Eko plus" u kojem su se takmičili učenici kakanjskih osnovnih škola. Kviz je sadržavao pitalice i igre kroz koje se provjerava znanje takmičara iz oblasti zaštite okoliša, a svi zajedno, publika u studiju i gledatelji ispred malih ekrana, su učili o mjerama zaštite okoline, o reciklaži otpada, o energetske efikasnosti... Za pomenutu aktivnost Općina Kakanj je utrošila 13.000 KM.

Općina Kakanj je pionir i lider u uspostavi vlastitog i od privrede nezavisnog mjerenja kvaliteta zraka. Općina Kakanj pomoću vlastite mobilne monitoring stanice kontinuirano prati kvalitet zraka u Kaknju kako bi se, u slučaju potrebe, poduzele mjere na zaštiti zdravlja stanovništva. Praksa mjerenja kvaliteta zraka vlastitom mobilnom stanicom u Kaknju se primjenjuje već nekoliko godina. Ukoliko se putem mobilne monitoring stanice zabilježi prekomjerna zagađenost zraka, uz istovremeno uspostavljenu stabilnu vremensku situaciju koja je karakteristična po sporom pomjeranju atmosferskog pritiska, slabom vjetru i pojačanoj temperaturnoj inverziji koja bi se mogla zadržati u narednih 48 sati, Operativni štab Općine Kakanj za primjenu Plana interventnih mjera u slučajevima prekomjerne zagađenosti zraka proglašava jednu od epizoda, te poduzima mjere prema zagađivačima i daje upute stanovništvu. Podaci o kvaliteti zraka se objavljuju na službenoj web-stranici Općine Kakanj www.kakanj.gov.ba, tako da su podaci svakodnevno dostupni građanima, novinarima, eko-udruženjima i svim drugim zainteresiranim subjektima. Tokom perioda karakterističnog po povećanju zagađujućih materija u zraku Općina Kakanj obezbjeđuje besplatan prijevoz vikendom za građane do kakanjske vazdušne banje Ponijeri. Za poslove koji obuhvataju ručno i mehaničko čišćenje, pranje, uklanjanje nečistoća sa gradskih i prigradskih javnih površina i saobraćajnica Općina Kakanj je u 2016.godini izdvojila iznos od

315.998 KM, a za unapređenje i održavanje javnih zelenih površina (gradskih i prigradskih) izdvojeno je 104.537 KM.

U 2016. godini održane su dvije volonterske akcije – proljetno čišćenje u aprilu pod nazivom „Kaknju s ljubavlju“ i oktobarska akcija pod nazivom „Milion sadnica za jedan dan“.

Ukupna ulaganja Općine Kakanj u segment zaštite okoliša u 2016. godini iznose 2.082.118 KM.

7. Općinsko vijeće Kakanj razmatralo 131 tačku dnevnog reda, uveden “eParlament sistem” koji omogućava glasanje elektronskim putem

U 2016. godini Općinsko vijeće Kakanj održalo je 8 sjednica. Razmatrana je 131 tačka dnevnog reda, 26 programa i planova, 38 izvještaja... Postavljeno je, odnosno pokrenuto, 71 vijećničko pitanje i inicijativa. U okviru ukupne brojke od 131 tačke dnevnog reda, 3 se odnosilo na budžet i rebalans budžeta.

Tokom 2016. godine Općina Kakanj je uvela “eParlament sistem” koji omogućava glasanje vijećnika elektronskim putem i upotrebom službenih tablet uređaja za glasanje. Svaki vijećnik koristi po jedan tablet uređaj za glasanje, te korisničko ime i šifru. Nakon prijave, svaka akcija koja se želi izvršiti postiže se dodiranjem ekrana. Na ovaj način vijećnici potvrđuju prisustvo sjednici, usvajaju zapisnike ili prijavljuju primjedbe, upućuju prijave za izjašnjavanje, glasaju biranjem opcija “za”, protiv” i “suzdržan”, prijavljuju se za diskusiju, ispravku krivog navoda ili povredu poslovnika... Sistem “eParlament” vijećnicima omogućava pristup materijalima za sjednice, omogućava slanje određenih dokumenata Stručnoj službi za poslove Općinskog vijeća, te druge opcije.

Rezultati glasanja elektronskim putem se prikazuju na velikom displeju koji je postavljen u sali Općinskog vijeća Kakanj.

8. Više od 800.000 KM uloženo u sport

U Budžetu Općine Kakanj za 2016. godinu transfer za sport planiran je u iznosu od 500.000 KM, a realizacija iznosi 98,28 % ili 491.391 KM što je za 140.000 KM više izdvajanja nego prošle godine. Raspodjela sredstava sportskim klubovima izvršena je na osnovu dostavljenih programa rada sportskih klubova po javnom pozivu kojeg je objavila Općina.

Ovoj cifri treba dodati i 200.000 KM koliko koštaju troškovi korištenja dvoranskih kapaciteta.

Podsjećamo, klubovi su oslobođeni plaćanja ovih troškova, a uslove za treniranje obezbjeđuje Općina Kakanj budžetskim finansiranjem troškova rada Javne ustanove Kulturno-sportski centar Kakanj koja upravlja dvoranskim sportskim kapacitetima.

Osim toga, početkom prošle godine Općina Kakanj je isplatila 16.000 KM za troškove asfaltiranja saobraćajnice na stadionu na kojem nastupa premijerligaš FK “Mladost”. Ako se ovoj cifri doda i cifra od 9.330 KM koja je izdvojena za sportske sadržaje upriličene u okviru Kulturno-sportske manifestacije “Kakanjski dani”, kao i troškovi asfaltiranja dva sportska poligona na Bočići (18.178 KM), te 100.000 KM novčane donacije bratske Općine Aliağa za izgradnju sportskog poligona sa dječijim igralištem u gradskoj jezgri Kaknja, dobije se cifra od 834.899 KM koliko je uloženo u kakanjski sport u 2016. godini.

Ilustracije radi, izdvajanje za sport u 2012. godini je iznosilo 263.000 KM.

U 2016. godini Kakanj je bio dio velikog događaja – Trke mira, najveće svjetske štafetne trke sa bakljom mira. Baklju mira koja je, u okviru evropskog dijela “Trke mira”, krenula 24. februara 2016. godine iz Portugala, a koja je prošla kroz 47 evropskih zemalja kako bi 8. oktobra 2016. godine stigla u Rim, u Kakanj su regionalom iz pravca Zenice donijeli članovi međunarodnog tima trkača. Na ulazu u gradsku jezgru baklju su dočekali učenici Osnovne škole “Mula Mustafa Bašeskija”

Kakanj koji su, zajedno sa međunarodnim timom trkača, baklju pronijeli kroz gradsku jezgru Kaknja do sale svoje škole gdje je upriličen svečani doček.

Nakon što je 2015.godine ugostio mladu reprezentaciju Bosne i Hercegovine koja je na stadionu FK "Rudar" igrala prijateljsku utakmicu sa Turskom, te nakon što je bio domaćin priprema rukometnih reprezentativnih juniora, Kakanj je ove godine bio domaćin još jednog velikog događaja – testnog okupljanja, a potom i priprema zlatnih košarkaških kadeta BiH pred Svjetsko prvenstvo u košarci.

U 2016.godini Fudbalski klub Mladost Doboj-Kakanj bio je domaćin utakmice U16 reprezentacija Bosne i Hercegovine i Litvanije (UEFA razvojni turnir). Općina Kakanj i FK Mladost su bili domaćini prijateljskog susreta ženske fudbalske reprezentacije BiH i Crne Gore koji se odigrao u okviru UEFA razvojnog turnira u ženskom nogometu U-19 selekcija.

Općina Kakanj je finansijski podržala i organizaciju Međunarodnog atletskog mitinga u Zenici na kojem je nastupio naš sugrađanin Amel Tuka. Općina Kakanj je finansijski podržala i organizaciju Malih olimpijskih igara, odlaske nadarenih sportista na međunarodna takmičenja, izdvojila je 1.000 KM u svrhu posjete Muzeju Kaknja sportskih ekipa koje gostuju u našem gradu...

Kakanj je u 2016.godini imao 4 premijerligaša. Po izboru Olimpijskog komiteta BiH Kakanjac Amel Tuka proglašen je sportistom godine za 2016.godinu.

9. Isplaćene općinske stipendije, osigurana sredstva za prijevoz učenika i studenata, podrška za centre za djecu i odrasle osobe sa posebnim potrebama, nagrade za učenike generacije...

Općina Kakanj svake godine dodjeljuje stipendije i studentima i učenicima srednjih škola, što je rijetkost jer stipendije za studente obično dodjeljuju kantonalna ministarstva koja su nadležna za oblast obrazovanja, dok su rijetke ili gotovo da nema lokalnih zajednica koje stipendiraju učenike srednjih škola. Kakanjski studenti koji ostvaruju izvanredne rezultate pravo na stipendiju ostvaruju automatski bez bodovanja. Također, automatski bez bodovanja pravo na stipendiju ostvaruju i učenici srednjih škola - djeca sa posebnim potrebama, djeca poginulih rudara i djeca iz populacije Roma. Učenik srednje škole koji ponese titulu učenika generacije ostvaruje, automatski bez bodovanja, pravo na stipendiju za prvu godinu studija. Svake godine dodjeljuju se novčane i druge nagrade za učenike koji ostvare zapaženje rezultate na školskim takmičenjima i za učenike generacije.

Tokom 2016. godine Općina Kakanj je izvršila sve obaveze u pogledu isplate općinskih stipendija za 166 učenika srednjih škola (visina stipendije po učeniku 300 KM) i 150 studenata (visina stipendije po studentu 800 KM).

Općina Kakanj finansira i prijevoz učenika i studenata u iznosu od 100 % ili 50 % u ovisnosti od socijalne karte porodice kojoj učenik pripada. U školskoj 2016/2017. pravo na ovu povlasticu ostvaruje 270 učenika i 34 studenta. Općina Kakanj finansira i prijevoz za 11 korisnika Centra za djecu i odrasle osobe sa posebnim potrebama Dobrinje (Visoko) sa povlasticom od 100 %, kao i troškove prijevoza sedmero učenika sa posebnim potrebama koji pohađaju OŠ "Hamdija Kreševljaković" Kakanj i Dnevni centar u Zenici, a koji ne mogu koristiti javni prijevoz.

Općina Kakanj finansira i organiziranje općinskih takmičenja osnovaca i srednjoškolaca, te obezbjeđuje novčane nagrade za najbolje učenike sa takmičenja, te za učenike generacije osnovnih i srednjih škola. Za učenike generacije osnovnih i srednjih škola isplaćuje se nagrada u novčanom iznosu od 200 KM.

Općina Kakanj je finansirala i općinska školska takmičenja iz matematike, fizike i engleskog jezika. I u školskoj 2016/2017. godini Općina Kakanj finansira užinu za djecu iz socijalno ugroženih porodica koje ostvaruju stalnu socijalnu pomoć. Za svako dijete izdvaja se po 1 KM za svaki radni dan tokom mjeseca. Sredstva se isplaćuju putem Centra za socijalni rad Kakanj.

Općina Kakanj redovno finansira rad Javne ustanove za predškolski odgoj i obrazovanje "Mladost" Kakanj, a finansirala je i 5 projekata predškolskih ustanova kojima Općina nije osnivač i za tu svrhu je do sada plaćeno 15.000 KM.

Općina Kakanj učestvuje u sufinansiranju dnevnih centara za djecu i odrasle sa posebnim potrebama u Zenici i Dobrinju (Visoko).

Zajedno sa UNICEF-om Općina Kakanj finansira projekat "Povećajmo mogućnosti djeci u Kaknju za rano učenje". Cilj projekta kojeg realizira Javna ustanova za predškolski odgoj i obrazovanje "Mladost" Kakanj je afirmacija predškolskog odgoja i obrazovanja u našoj lokalnoj zajednici, s akcentom na djecu slabijeg imovnog stanja (djeca iz porodica Roma i porodica korisnika socijalne pomoći).

Općina Kakanj je partner u realizaciji projekta rekonstrukcije zgrade Osnovne škole "Hamdija Kreševljaković" Kakanj koja je nakon radova poprimila potpuno novi, ljepši i moderniji izgled i zasijala nesvakidašnjim sjajem.

10. Boračko-invalidska zaštita

Premda nadležnost za pružanje pomoći boračkim populacijama imaju ministarstva za boračka pitanja ZDK i F BiH, Općina Kakanj nastoji da iz svog budžeta pomogne boračkim populacijama. Jedan od načina pomaganja su i jednokratne novčane pomoći. Tokom 2016. godine za jednokratne novčane pomoći boračkim populacijama isplaćeno je 100.490 KM.

Osim toga, Općina Kakanj finansira i rad boračkih udruženja. Ova udruženja kroz svoj rad, iz dijela sredstava koja dobiju od Općine, pomažu pripadnicima boračkih populacija, te realiziraju aktivnosti koje su usmjerene na zaštitu tekovina Odbrambeno-oslobodilačkog rata 1992-1995. Iz Budžeta Općine Kakanj boračkim udruženjima je tokom 2016.godine isplaćeno ukupno 150.981 KM.

Svi značajni datumi iz perioda 1992-1995. u Kaknju se obilježavaju na dostojanstven način, a glavni finansijer organizacije obilježavanja je Općina Kakanj.

11. 32 predstave (4 iz vlastite produkcije), 12 filmova, festivali, "Kakanjski dani", "Bilo jednom na Balkanu"...

Tokom 2016.godine u kakanjskom kinu prikazano je 12 filmova – 11 stranih i jedan iz domaće produkcije. U kakanjskom kinu zabilježeno je 2.950 gledatelja. U Domu kulture Kakanj odigrane su 32 predstave od kojih su 4 iz vlastite produkcije Javne ustanove Kulturno-sportski centar Kakanj (JU KSC). Predstave je posjetilo 6.800 građana.

Kakanj je i ove godine bio domaćin VIVA film festivala religijskog, ekološkog, turističkog i omladinskog dokumentarnog filma i domaćin Internacionalnog edukativnog teatra – IFET. Dokumentarni film "Stop diskriminaciji" kojeg su snimali polaznici Dramskog studija koji djeluje pri JU KSC Kakanj osvojio je nagradu na VIVA film festivalu. Nagrada – Cannon kamera je tako postala vlasništvo JU KSC.

U Domu kulture Kakanj organizirana su i 22 događaja u kojima se JU KSC Kakanj pojavljuje kao domaćin, tehnička podrška, partner, suorganizator ili organizator.

Ovogodišnja manifestacija "Kakanjski dani" koju su organizirali Općina Kakanj i Javna ustanova Kulturno-sportski centar Kakanj bila je jedna od najbolje organiziranih manifestacija ove vrste u Kaknju promatrajući poslijeratne godine. Tokom 7 dana trajanja ove manifestacije zabilježeno je oko 90.000 posjetilaca. Nastupili su: Amar Jašarspahić Gile, Denial Ahmetović, Lapsus bend (Emir Aličković), Ibro Bublin, Fatmir Sulejmani, Rudarska glazba, "AlterVal", duvački orkestri, mažuretkinje...

Javna ustanova Kulturno-sportski centar Kakanj, Udruženje mladih "AlterVal" i Video produkcija „Frame production“ organizirali su "Kraljev fest" na kojem su nastupili Irina Kapetanović, "Fallout", "Strava škola", "Indigo", "AlterVal" i Vesna Tomičić, a upriličene su i likovna kolonija, izložba, pozorišna predstava "Bosanska kraljica" i čas historije na Bobovcu.

U saradnji JU KSC, muzičkih bendova, Gradskog hora, Hora "Bostan", Crkvenog hora, Dramskog studija Kakanj, Škole glume Kakanj, Rudarske limene glazbe, Tamburaškog orkestra i drugih subjekata, u Kaknju je organiziran spektakularan događaj – koncert domaće filmske muzike "Bilo jednom na Balkanu".

JU KSC je, kao i prethodnih godina, i u 2016. godini organizirala takmičenje za mlade pod nazivom "Talent Show". Ovo takmičenje predstavlja sjajnu priliku za mlade talentirane građane Kaknja da pokažu svoj talent, da dobiju prvi aplauz i da tako ohrabreni krenu na veća takmičenja u BiH i regionu.

Muzej Kaknja tokom 2016. godine organizirao je 18 edukativnih sadržaja, zabilježio 2.772 posjete građana i otvorio svoju suvenirnicu. U Gradskoj galeriji likovne umjetnosti upriličeno je 5 izložbi slika.

Javna ustanova Kulturno-sportski centar Kakanj je organizirala i 18 kurseva koje je pohađalo 129 polaznika.

U Sportskoj dvorani Kakanj organizirano je ukupno 98 različitih sadržaja, od koji se 70 odnosi na utakmice organizirane u okviru prvenstava, kup takmičenja i prijateljskih susreta. U Sportskoj dvorani Kakanj, promatrajući aktivnosti upriličene na parketu ovog objekta, odrađeno je 2.133,5 sati, u sali na posljednjoj etaži objekta "ReAl" 462 sata, u kuglani 518,5 sati i trim kabinetu 270 sati, dok je ski-lift Ponijeri radio 46 sati (bilo bi i više da je bilo snijega). Posebno je rastao broj odrađenih sati kuglanja, sa 307 koliko je iznosio prošle godine, na 518,5 koliko iznosi u 2016. godini. Rezultat je to aktivnosti JU KSC na promociji kuglanja, aktivnosti na organizaciji škole kuglanja, te prakse organiziranja brojnih posjeta kakanjskoj kuglani. Tokom 2016. godine u kakanjskoj kuglani je organizirano 14 događaja koji se odnose na prvenstva i turnire.

U dvoranskim kapacitetima kojima upravlja JU KSC Kakanj organizirani su i brojni drugi sadržaji u kojima se Ustanova pojavljuje kao organizator ili suorganizator: turniri, Biznis liga, humanitarne utakmice, takmičenja učenika osnovnih i srednjih škola...

U okviru Kulturno-sportske manifestacije "Kakanjski dani" organizirano je 11 sportskih aktivnosti: turnir u odbojci, rukometu i basketu, paintball turnir, adrenalinski park, rapid nogomet, turnir u stonom tenisu, biciklistička utrka, ulična trka, prezentacija borilačkih sportova i šahovski turnir. Na ovim sportskim događajima zabilježena su čak 533 učesnika.

Javna ustanova Kulturno-sportski centar Kakanj je "produžena ruka" Općine Kakanj. U njenom sastavu djeluju Sportska dvorana, kuglana, dvorana na posljednjoj etaži objekta "ReAl", kulturni školski Caffè bar "Evropa" koji je ove godine rekonstruisan, Dom kulture sa velikom (kino) salom, Muzej Kaknja, Gradska galerija likovne umjetnosti, Omladinski centar i ski-lift Ponijeri. Ustanova se finansira općinskim budžetskim sredstvima, ali i sama ostvaruje određenu dobit iz koje je u 2016. godinu kupila veliku binu, vitrine za Muzej Kaknja, postavila ogradu ispred Doma kulture, te poduzela niz drugih intervencija i investicionih zahvata.

12. PVJ Kakanj zabilježila 129 intervencija, 67 intervencija manje u odnosu na prošlu godinu

Tokom 2016. godine Profesionalna vatrogasna jedinica Kakanj (PVJ) je imala ukupno 129 intervencija što je za 67 intervencija manje u odnosu na prošlu godinu. Ovakvi pozitivni rezultati su posljedica adekvatnog provođenja preventivnih mjera u oblasti zaštite od požara i posljedica porasta svijesti građana o opasnostima koje prijete u slučaju nastanka požara. Međutim, brojka šumskih požara i požara suhe trave i niskog rastinja je gotovo identična prošlogodišnjoj brojci što predstavlja obavezu da se u budućem periodu pojačaju aktivnosti na preventivnom djelovanju u ovoj oblasti. Ta aktivnost obuhvata i obavezu da u preventivnim aktivnostima više učestvuju i pravna lica iz oblasti šumarstva, te da ista budu više osposobljena za gašenje požara čime bi adekvatnije izvršavala svoju zakonsku obavezu.

U slučajevima požara na vozilima i saobraćajnim nesrećama kakanjski vatrogasci su intervenirali 8 puta što je za 4 manje u odnosu na prošlu godinu. Broj tehničkih intervencija koje se odnose na

otključavanje stanova, prijevoz vode i slično iznosi 24 što je duplo manje u odnosu na prošlu godinu.

Broj intervencija u slučajevima požara na stambenim objektima iznosio je 5 što je također duplo manje u odnosu na prošlu godinu. U slučajevima zapaljenja dimnjaka vatrogasci su intervenirali 15 puta, dok je prošle godine brojka ovih intervencija iznosila 13.

U slučajevima zapaljenja kontejnera, guma i sijena broj intervencija je iznosio 26, dok je prošle godine broj intervencija ove vrste bio 56.

Tokom 2016.godine na području Kaknja prikupljena su 43 komada neeksplozivnih ubojnih sredstava, a radilo se o tromblonima, minama, bombama i slično. Prikupljeno je i 120 komada sitne municije kalibra 7,62 mm.

U 2016.godini težište djelovanja Službe civilne zaštite u pogledu sanacije klizišta bilo je na sanaciji klizišta koja ugrožavaju stambene objekte. Odvodnja oborinskih i podzemnih voda iz zone klizišta vršena je u saradnji sa stanovništvom na način da se drenažne cijevi dodijele vlasnicima parcela, te da oni izvrše ugradnju. U svrhu iskopa kanala, te za izradu drenaže i uklanjanje dijelova kliznih površina koji su sprečavali prohodnost puteva Služba civilne zaštite je angažirala mehanizaciju. Ove palijativne mjere su provedene u Lučićima, Modrinju, Brnju, Desetniku, Bukovlju, Hausovićima, Zagrađu, Živaljima, Velikim Trnovcima, Vehabima, Povezicama, Nažbilju, te u blizini Vatrogasnom doma Doboj.

Početak decembra 2016.godine počeli su radovi na sanaciji klizišta u naseljima Brnj, Kraljeva Sutjeska i Tršće, te u ulici Omera Maslića, na lokacijama gdje su ugroženi stambeni objekti i infrastruktura. Realizacijom ovi aktivnosti steći će uslovi za povratak jedne porodice kući (Kraljeva Sutjeska), dok će na ostalim lokacijama biti umanjen sigurnosni rizik.

Općina Kakanj kontinuirano radi na jačanju i materijalnom opremanju struktura civilne zaštite. Tokom 2016.godine izvršena je nabavka specijaliziranog vozila četverotočkaša za potrebe Profesionalne vatrogasne jedinice Kakanj. Radi se o četverotočkašu specijaliziranom za više namjena. Naime, vozilo ima priključak za grtalicu pa će se moći upotrebljavati i za čišćenje puteva od snijega pri intervenciji vatrogasaca. Vozilo ima i prikolicu. Ove karakteristike će omogućiti da tokom ljetnog i zimskog perioda vatrogasci mogu brzo stići do svake lokacije na kojoj se ukaže potreba za intervencijom, a bit će u prilici da sa ovim vozilom sa bilo koje tačke izvrše transport povrijeđenih lica, da izvrše dostavu hrane i lijekova na svaku lokaciju itd.

Izvršena je i nabavka rafting-čamca sa opremom, nabavka motorne pile, uniformi za intervencije, šljemova... Izvršena je i nabavka 10 kompleta uniformi za povjerenike civilne zaštite, te nabavka materijalno-tehničkih sredstava za jedinice civilne zaštite opće namjene (lopate, kramp, sjekire, rukavice).

Tokom 2016.godine izvršena je obuka 6 pripadnika Profesionalne vatrogasne jedinice Kakanj u oblasti spašavanja na vodi i pod vodom.

Na Susretima vatrogasaca Zeničko-dobojskog kantona, koje je povodom 4. maja–Svjetskog dana vatrogasaca, organizirao Vatrogasni savez ZDK 7. maja 2016.godine u Nemili (Zenica) učestvovali su i profesionalni i dobrovoljni vatrogasci iz Kaknja. Manifestacija čiji je cilj zbližavanje, druženje i širenje saradnje među vatrogascima ZDK sadržavala je pokazne vježbe koje su izveli vatrogasci iz Kaknja (podmladak i muško odjeljenje), Zenice – žensko i muško odjeljenje i Visokog – muško odjeljenje. U izvođenju pokaznih vježbi kakanjski vatrogasci su, između ostalog, koristili i vatrogasnu pušku, te vatrogasni top – savremena sredstva za gašenje požara koja je prošle godine kupila Općina Kakanj. Upriličene su i sportske aktivnosti u kojima su kakanjski vatrogasci ostvarili odlične rezultate. U navlačenju konopca naši vatrogasci su osvojili prvo, a u šahu treće mjesto. Domaćin ove manifestacije bilo je Dobrovoljno vatrogasno društvo Zenica.

Na Međunarodnom malonogometnom turniru vatrogasaca koji je 23. oktobra 2016. godine odigran u Areni Zenica prvo mjesto osvojila je, drugu godinu zaredom, ekipa Profesionalne vatrogasne jedinice Kakanj. Na turniru su još nastupile ekipe Dobrovoljnog vatrogasnog društva Jelah, Dobrovoljnog vatrogasnog društva Zenica, Dobrovoljnog vatrogasnog društva Beli Manastir (Republika Hrvatska), ekipa Profesionalne vatrogasne jedinice Zenica, ekipa Profesionalne vatrogasne brigade Sarajevo, te ekipa Dobrovoljnog vatrogasnog društva Tešanj.